




C 125

R







10 xbrw 1644

*Ferme générale*

# BAIL GÉNÉRAL

DES FERMES DES GABELLES  
DE LYONNOIS, LANGVEDOC, INTRO-  
duction & fournissement des Sels és Cantons des Lignes  
Suisses, leurs Alliez, Valey, Duché de Sauoye & Ville  
de Geneve, du sol pour liure cy-deuant attribué aux Con-  
trollers Conseruateurs desdites Gabelles & leurs Lieute-  
nans, & des droicts cy-deuant allienéz desdites Gabelles  
de Lyonnois, joints & revnis à ladite Ferme: Faiet par sa  
Maiesté à M<sup>c</sup> Jacques Iannon pour neuf années, com-  
mencées le premier Iuillet 1645. & finissant le dernier  
Iuin 1654.

*Donné à Paris le dixième iour de Decembre 1644.*



A P A R I S,

Par RENE' BAUDRY, tenant son Imprimerie  
rue Ticquetonne, par Priuilege du Roy,

M. DC XLV.

CASE

F

39

326

1645fs

THE NEWBERRY  
LIBRARY





NOVIS PAR LA GRACE DE  
DIEV ROY DE FRANCE ET DE  
NAVARRÉ: A tous ceux qui ces  
presentes verront, Salut. Le feu Roy  
nostre tres-honoré Seigneur & Pere,  
auroit par ses Lettres du dernier Mars  
mil six cens trente-cinq, faiçt Bail & adjudication à  
M<sup>e</sup> Iean Riquier des Fermes des Gabelles de Lyon-  
nois, Languedoc, Doüanne de Valence & Traictes  
Estrangeres pour dix années, qui ont commencé dès  
le premier Iuillet audit an 1635. ainsi qu'il est plus  
particulierement exprimé par lesdites Lettres, du-  
quel Bail la Ferme de ladite Doüanne de Valence au-  
roit esté distraicte depuis, & revnie au Bail de nos  
Gabelles de Dauphiné & Prouence, ou elle est enco-  
res jointe à present: Lesquelles dix années finissant  
le dernier Iuin prochain, Nous auons dès le premier  
d'Aoust dernier, faiçt expedier & adresser nos Let-  
tres de Commission à nos Amez & Feaux Conseillers  
les Tresoriers generaux de France à Montpellier,  
Tholouse, Lyon & Dijon, pour chacun en l'estenduë  
de leur Generalité, faire publier lesdites Fermes,  
estre à bailler en nostre Conseil, & faire sçauoir que  
toutes personnes bien cautionnées seroient receuës à  
les encherir: Receuoir les encheres, en dresser procez

verbal & l'enuoyer en nostre Conseil, avec les encherisseurs dans le dixième Septembre suiuant, pour estre procedé en iceluy au Bail & adjudication au plus offrant & dernier encherisseur en la maniere accoustumée, en consequence dequoy lesdits Tresoriers generaux auroient fait afficher és Villes & lieux accoustumez depuis le premier iusques au dernier dudit mois d'Aoust, & mesmes fait faire les publications en leurs bureaux, sans que personne se soit présenté pardeuant eux, pour encherir ainsi qu'il nous est apparu par les procez verbaux de l'apposition des Affiches, publications & proclamations par eux enuoyées en nostredit Conseil: Ensuite desquels nous auons ledit iour dixième dudit mois de Septembre, fait apposer des Affiches à la Porte ordinaire de nostre Chasteau du Louure, és lieux & endroits accoustumez, contenant qu'il seroit ledit iour procedé en nostredit Conseil audit Chasteau du Louure, aux publications, Bail & adjudication au plus offrant & dernier encherisseur pour neuf années consecutiues, qui commenceront le premier Iuillet prochain, & finiront le dernier Iuin mil six cens cinquante quatre, de la ferme des Gabelles de Lyonnois & Languedoc, introduction & fournissement de sel, és Cantons & Ligues Suisses, leurs Alliez, Valley, Duché de Saouye & Ville de Geneve, ensemble du sol pour liure cy-deuant attribué aux Controllers Conseruateurs desdites Gabelles de Lyonnois & Languedoc, & leur Lieutenans, reduits au denier quatorze, par Arrest du Conseil du vingt-cinquième Feurier mil six cens



quarante-trois, & de la ferme des droicts qui se le-  
 uoient cy-deuant par augmentation outre le prix du  
 sel attribuez a aucuns Officiers des Greniers de Lyon-  
 nois, Masconnois, Bresse & haut Viuairetz, depen-  
 dans de ladite Ferme, lesdits droicts à nous reuenans  
 bons au moyen du remboursement qui en a esté fait  
 aux Propriétaires desdits Offices en rentes sur l'Ho-  
 stel de Ville de Paris, suiuant l'Edit du mois de Fe-  
 urier mil six cens trente-quatre, lesquels droicts ain-  
 si qu'ils se leuent à present, demeureront vnis & in-  
 corporez à ladite ferme, & sans que pour lesdits droits  
 aliennez ny ceux de franc-sallé, dont jouyssoient les  
 Propriétaires d'aucuns desdits Offices supprimez,  
 qui se prenoient sur le prix du sel esdits Greniers, il  
 soit à l'aduenir fait aucune distraction ny descharge,  
 ny que pour raison de ce, il soit employé en charge  
 és Estats desdites Fermes aucunes des sommes accou-  
 stumées estre employées par chacun an és Estats de la  
 Ferme desdits droicts alienez; Et que toutes person-  
 nes bien cautionnées seroient receus à les encherir sur  
 l'offre faicte par M<sup>e</sup> Cabouc Aduocat en  
 nostre Conseil, d'en payer deux millions cinq cens  
 mil liures par chacune desdites neuf années, & de  
 nous faire prest & aduance de la somme de quatre  
 cens mil liures, pour en estre remboursé sur les deux  
 premiers quartiers desdites fermes de l'année mil  
 six cens quarante-six, auquel iour dixième dudit  
 mois de Septembre, ayant en la Chambre où se tient  
 nostredit Conseil, a huis ouuerts fait publier ladite  
 Ferme, allumer les chandelles, & réglé les encheres a

dix mil liures, & sans que pendant leur feu aucuns ayent enchery: Nous aurions remis & continué l'adjudication du dix au dix-septième, du dix septième au vingt-huitième dudit mois, & ce pendant fait mettre des Affiches aux lieux accoustumez, aduenant lequel iour vingt-huitième Septembre, ladite Ferme fut en la Chambre de nostredit Conseil à huis ouverts, publiée à haute & intelligible voix par les Huissiers d'iceluy, plusieurs chandelles allumées & au troisième feu encherie à deux millions six cens soixante mil liures, par Maistre Iean Grignon aussi Advocat en nostredit Conseil, au cinquième feu par Charles le Grand, à deux millions sept cens mil liures, avec offre de nous faire prest & aduance de huit cens mil liures, pour en estre remboursé pendant les quatre quartiers de l'année mil six cens quarante-six, également, au sixième feu par ledit Grignon, à deux millions sept cens vingt mil liures, & neuf cens mil liures de prest, au septième feu par Maistre Iean Iacquet Grosos, à deux millions sept cens trente-mil liures & pareil prest, Et ayant faict allumer trois autres chandelles qui auroient esté esteintes sans aucune encherie. Nous aurions encore remis & continué l'adjudication à Fontainebleau au douzième du mois d'Octobre ensuiuant, qu'Affiches furent remises, ladite Ferme publiée en nostredit Conseil, les chandelles allumées comme les iours precedens, & au premier fut encherie par ledit le Grand, à deux millions huit cens mil liures, & prest d'un million de liures, pour en estre remboursé en l'année mil six cens qua-



rante-sept, au quatriéme feu par ledit Grignon, à deux millions huit cens vingt mil liures, & douze cens mil liures de prest, & au cinquiéme feu par M<sup>e</sup> Jacques Iannon, à deux millions huit cens cinquante quatre mil liures, & six mil liures par chacune desdites années aux Iesuittes de Lyon, & outre de payer vne seule fois la somme de vingt sept mil liures d'aumosnes: Sçauoir, quinze mil liures aux pains des pauvres, cinq mil liures pour partie de ornemens & meubles de la Chappelle du Conseil au Louure, trois mil liures aux Peres de l'Oratoire de Clermont Ferrand, & quatre mil liures à

Et encore de payer vne seule fois la somme de trente sept mil liures à l'Espargne, pour estre employée ainsi qu'il sera par nous ordonné, & outre de nous faire prest & aduance de la somme de deux millions cent vingt mil liures, compris les interests en six termes esgaux dans les six mois prochains, dont le premier escherra le quinziéme Decembre mil six cens quarante-quatre, & les autres les quinziéme de chacun des cinq mois suiuaus, pour en estre remboursé par preference à toutes assignations des premiers deniers prouenans de ladite Ferme des quatre quartiers de ladite année mil six cens quarante sept, & du quartier de Ianuier mil six cens quarante-huit esgalement, & ce qui s'en manquera sur le quartier d'Auril ensuiuant. Et ne s'estant présenté autres enchérisseurs, ains seulement M<sup>e</sup> Tre-court, Vanel & Payen, qui nous auroient proposé d'vnir la dite Ferme avec celle de Dauphiné & Prouence, & de

faire nostre condition en faisant ladite vnion aduanta-  
 geuse, nous aurions remis l'adiudication & de deliberer  
 à Paris sur ladite vnion, au neuuiesme du mois de No-  
 uembre, du neuf au douze, du douze au seize, ausquels  
 iours lesdites propositions d'vnion ayant esté exami-  
 nées, ladite Ferme desdites Gabelles de Lyonnois &  
 Languedoc publiée en la Châbre de nostredit Conseil  
 audit Chasteau du Louure, & lesdites publicatiōs reï-  
 terées par Tourte Huissier, & six chandelles allumées  
 sans qui pendant icelles, il se soit présenté aucune  
 personne qui ait enchery : Pourquoy ledit Iannon  
 auroit requis l'adjudication pure & simple de ladite  
 Ferme des Gabelles de Lyonnois & Languedoc, In-  
 troductiō & fournissement des sels és Cantons &  
 Ligues Suisses, leurs Alliez, Valley, Duché de Sa-  
 uoye & Ville de Geneve, & du sol pour liure cy de-  
 uant attribué ausdits Controlleurs Conseruateurs de  
 ladite Ferme desdites Gabelles de Lyonnois & Lan-  
 guedoc, & leurs Lieutenans, ensemble de la Ferme  
 des droicts cy-deuant alienez sur lesdites Gabelles de  
 Lyonnois aux susdites conditions, ce que luy aurions  
 octroyé à la charge que le bail ne luy sera deliuré que  
 dans le Samedy suiuant dix-neuuième dudit mois, &  
 que si pendant ledit temps il se faisoit quelques en-  
 cheres, elles luy seroient communiquées, escheant  
 lequel iour lesdits Vanel & Payen ayans persisté à la-  
 dite vnion, Nous aurions surcis & remis le tout au Sa-  
 medy vingt. fixième dudit mois, Et apres auoir reco-  
 gnu lesdites propositions d'vnion & leurs offres n'e-  
 stre vtiles & aduantageuse pour le bien de nos affai-  
 res,



res, N O V S aurions fuiuant les requisitions dudit  
 Iannon, reietté lefdites propositions d'vnion, & or-  
 donné que desliurance luy seroit incessamment faite  
 du Bail de ladite Ferme. A C E S C A V S E S, D E  
 L' A D V I S de nostre Conseil, Nous auons audit M<sup>e</sup>  
 Jacques Iannon comme plus offrant & dernier enche-  
 risseur, fait Bail, adjudication & desliurance desdi-  
 tes Fermes des Gabelles de Lyonnois & Languedoc,  
 Introduction & fournissement des sels és Cantons  
 des Lignes Suisses, leurs Alliez, Valley, Duché de Sa-  
 uoye & Ville de Geneve, du sol pour liure cy-deuant  
 attribué ausdits Controlleurs Conseruateurs desdi-  
 tes Gabelles de Lyonnois & Languedoc & leurs Lieu-  
 tenens, ensemble de la Ferme des droicts cy deuant  
 alienez sur lefdites Gabelles de Lyonnois lesquels  
 nous auons joints & reünis à ladite Ferme, & sans que  
 pour raison d'iceux ny de ceux de Franc-sallé, dont  
 aucuns des Proprietaires desdits droicts & Offices  
 supprimez jouyssoient, il soit à l'aduenir employé  
 aucune descharge en la despence des Estats de ladite  
 Ferme, ny aucunes des sommes accoustumées estre  
 employées par chacun an és Estats de la Ferme parti-  
 culiere desdits droicts alienez, pour en jouyr durant  
 neuf années consecutiues, qui commenceront le pre-  
 mier Iuillet prochain, & finiront le dernier Iuin mil  
 six cens cinquante quatre, aux charges clauses & con-  
 ditions des precedens Baux & Traictez qui en ont  
 esté faits en nostredit Conseil aux Fermiers desdites  
 Fermes, & Entrepreneurs de ladite Introduction &  
 autres cy-apres declarées, à l'exception de ladite

*Adjudication  
des Fermes.*

Douïanne de Valence, à present revnie à la Ferme des Gabelles de Prouence & Dauphiné, comme est dict cy-dessus, Moyennant le prix & somme de deux millions huit cens cinquante quatre mil liures, & six mil liures aux Peres Iesuittes de Lyon par chacune desdites neuf années, outre vingt sept mil liures en aumosnes payables comme dessus, & trente sept mil liures à l'Espargne vne fois payez, & à la charge de nous faire prest & aduance dans les six prochains mois esgalement, dont le premier eschera au quinzième Decembre de la presente année, de la somme de deux millions cent vingt mil liures, compris les interets de l'aduance, pour en estre remboursé par preference à tous autres, des premiers deniers desdites Fermes, des quatre quartiers de ladite année mil six cens quarante sept, & du quartier de Ianuier 1648. esgalement, & ce qui s'en manquera sur le quartier d'Auril ensuiuant, y compris dans lesdits deux millions huit cens cinquante quatre mil liures d'une part, & six mil liures, d'autre: Les charges assignées sur lesdites Fermes, dont les Estats seront arrestez en nostredit Conseil, suiuant lesquels lesdites charges seront payées par ledit Fermier, & ce qui nous reuiendra de bonés mains des Tresoriers de nostre Espargne, chacun en l'année de son exercice de quartier en quartier & six sepmaines apres chacun expiré.

# PREMIEREMENT.

## I.

Reglement pour LA vente des sels aux Greniers de Languedoc, se



fera à raison de quinze liures le minot, en laquelle *la vente du sel de Languedoc.*  
 somme de quinze liures sont comprises les creuës de  
 quarante sols & le parisis, les quatre sols ordonnez  
 estre leuez en l'estenduë de ladite Ferme des Gabelles  
 de Languedoc, & l'achat & voicture desdits sels és  
 Greniers d'icelle qui se fournissent par eauë

## I I.

LA vente des sels des Greniers & Chambres en la- *Reglement pour la vente du sel dans la Ferme de Lyonnois.*  
 dite Ferme des Gabelles de Lyonnois, se fera au prix  
 estably dans iceux, ainsi qu'il s'y reçoit à present: Et  
 d'autant que des six liures d'augmentation ordonnez  
 estre imposez sur chacun minot de sel en l'estenduë  
 de la Ferme des Gabelles de Lyonnois, il n'en a esté  
 imposé que trois liures és Greniers & Chambres du  
 haut Viuarets dependans d'icelle. Nous promettons  
 audit Fermier d'en faire faire l'imposition & l'esta-  
 blissement esdits Greniers du haut Viuarets, ainsi  
 qu'il est porté par le Bail dudit Riquier, ensemble des  
 quarante sols pour minot en Lyonnois, accordez  
 pour le des-interessement dudit Fermier, a cause du  
 reestablissement des Regrattiers & du demy parisis,  
 suiuant l'Edict du mois de Feurier mil six cens trente-  
 huit, comme aussi sera fait seulement l'establisse-  
 ment & leuée d'un sol pour liure attribué aux Offices  
 de Controllours Conseruateurs & leurs Lieutenans  
 desdites Gabelles de Lyonnois & Languedoc, en l'es-  
 tenduë desdites Fermes, au lieu des deux sols pour  
 liure portez par l'Arrest de nostre Conseil du vingt-  
 cinquième Feurier mil six cens quarante trois

huc.

## I I I.

*Aucun entre-  
post ne se fera au  
village de Châ-  
pagne.*

NE pourront ceux de Dauphiné faire aucun entrepost ny vente de sel au village de Champagne, enclaué dans ladite Ferme de Lyonnois, à peine de confiscation & amende, suiuant les Arrests sur ce donnez, ains seront tenus lesdits Habitans de Champagne de se fournir és plus proches greniers de ladite Ferme de Lyonnois.

## I V.

*Les Habitans  
du haut Viua-  
rets se pouruoiront  
du sel és Greniers  
& Châbres, &  
les Ordonnances  
exécutes contre  
les contreuenans.*

LES Habitans de nostre Pays du haut Viualetz, seront tenus de prendre & se pouruoir du sel qui leur sera necessaire és Greniers establis d'ancienneté, & autres nouuellement erigez ausdits Pays chacun au ressort desdits Greniers, à peine contre les contreuenans d'estre Traictez comme faux-sauniers: Et seront à cet effet nos Ordonnances & Reglemens, ensemble l'Ordonnance donnée en conséquence par nos Officiers du Grenier à sel de Tournon & Chambre de Saint Agreue, le vingt-septiesme Nouembre mil six cens trente, exécutez au profit dudit Fermier. Et enjoignons ausdits Officiers d'y tenir la main, à peine d'en respondre en leurs propres & priuez noms.

## V.

*Ceux du franc-  
Lyonnois se four-  
niront du sel de  
ladite Ferme.*

Que ceux du franc-Lyonnois, se pretendans priuilegiez seront aussi tenus de se fournir en ladite Ferme de Lyonnois, à peine d'estre punis comme faux-sauniers, & sera permis audit Fermier d'en faire vn entrepost en la ville de Vimy, qui est du franc-Lyonnois.

## V I.

*Defences aux*

ET d'autant que nous ne pouuons cognoistre au



vray la valeur de nos Fermes, tant à cause des faux faunages qui se commettent, que des dons & presens que nos Fermiers, leurs Cōmis & Voïcturiers font en espece de sel au deschargement tant aux Officiers qui y assistent qu'autres personnes, au moyen dequoy se trouue grand dechet & difference en ce qui s'est chargé en nos marais, & ce qui entre en nos Greniers. Nous deffendons ausdits Officiers, Fermiers, leurs Commis, Voïcturiers, Patrons ou Mariniers, de permettre qu'aucuns sels se donnent ou prennent sur les barques, soit au deschargement ou ailleurs, à peine d'en respondre en leurs propres & priuez noms, & de cinq cens liures d'amande pour la premiere fois, & à toutes personnes d'en prendre & accepter, mesmes ausdits Officiers, soit par dons, gratuits ou autrement sur les mesmes peines, afin que ce qui se chargera esdits marais soit deschargé entierement dans esdits greniers.

*Patrons de donner, vendre ou permettre estre pris aucuns sels à peine de cinq cens liures d'amande.*

### V I I.

SERA permis audit Fermier d'establi des Chambres & greniers en l'estenduë desdites Fermes, & d'en supprimer ou transferer d'autre, ainsi qu'il verra estre à faire pour le bien d'icelles & soulagement de nos Sujets: Et commettra des Commis pour prendre garde aux chargemens, tirages & ventes de sel suiuant l'ordre & police qu'il iugera necessaire, sans qu'il puisse estre estably aucuns nouveaux Officiers.

*Permission d'establi des Chambres & Greniers, & d'en supprimer & transferer d'autres.*

### V I I I.

LEDIT Fermier aura l'entiere & libre administration du sel des Greniers & Chambres de l'estenduë

*Le Fermier aura la libre admi-*

*distillation du sel  
on l'estenduë des  
dites Fermes.*

desdites Fermes, sans qu'il nous puisse estre comprable en aucune façon, en observant toutesfois les conditions de son Contract & la sincerité des mesures.

## I X.

*Les Commun-  
autes ne pourr-  
ont vendre aucun sel  
ny imposer aucun  
droict sur iceluy.*

QVE nulles Cōmunautéz ny Particuliers ne pourr-  
ont vendre ny faire vendre du sel sous quelque pretexte  
que ce soit, s'il n'a esté pris & gabbellé en nos Greniers,  
mesmes imposer aucun droict sur iceluy sans nostre  
permission, & que ledit Fermier n'ayt esté ouy à peine  
de confiscation & de dix milliures d'amende.

## X.

*Les Reglemens  
sur la vente du  
sel seront obser-  
vez.*

POVRA ledit Fermier, si bon luy semble, faire  
garder & observer les departemens des greniers sur la  
vente & distribution du sel suivant les Reglemens,  
sans qu'il puisse estre empesché sous quelque pretexte  
que ce soit.

## X I.

*Reglemens pour  
Auillar.*

DEFFENCES seront faictes par Affiches & cris  
publics en nostre nom & autorité par tous les con-  
fins de ladite Ferme de Languedoc, & à tous Voi-  
cturiers, Batteliers, Conducteurs du long des Ri-  
vieres de Taon, Garonne & autres, de ne voicturer  
& conduire contremont icelles aucuns sels, mesmes  
au dessus d'Auillar, conformément au cinquante  
deuxième Article du Reglement general sur ce faict,  
à peine de confiscation de leurs Batteaux, Cheuaux,  
& Marchandises & autres amendes arbitraires, ny de  
charger & entreposer aucun sel plus pres de cinq  
lieuës des limites & confins dudit Languedoc: Et à  
cét effet, que les Arrests donnez en nostre Conseil



pour raison de ce, à la requeste des precedens Fermiers, seront executez comme s'ils auoient esté donnez au nom dudit Fermier, & que la Garnison par eux establie au lieu d'Auillar y sera restabllic, non obstant toutes Ordonnâces données & à donner par les Gouverneurs de nos Prouinces de Languedoc & Guyenne & leurs Lieutenans, auxquels nous enjoignons de tenir soigneusement la main à l'execution desdits Arrests & du present Bail.

## XII.

Tous les petits Salins de Languedoc depuis Peccais iusques à Narbonne seront interdits de faulner, & n'y aura que les Salins de Peccais, Narbonne & Peiriac qui pourront faire du sel attendus les grands larcins qui se commettent durant les faulnages, & toutesfois seront les Propriétaires desdits Salins par nous indamnisez, à quoy nous feront pouruoir ainsi qu'onous aduiserons bon estre, Et pour le regard desdits Salins de Peccais, Narbonne, Peiriac & Sejan, qui ont faulné iusques à present, Nous en accordons la jouissance audit Fermier, pendant le temps de son Bail, pour en disposer à sa volonté en payant au prealable aux Propriétaires d'iceux, la iuste velleur suiuant l'estimation qui en sera faite par les Tresoriers de France à Montpellier, ou autres Commissaires que nous deputerons audit effet.

## XIII.

POVRA ledit Fermier si bon luy semble, contraindre les Propriétaires des Salins qui auront faulné, faire reparer les magasins à sel qui auront esté rui-

*Reglement pour  
les Salins de Lan-  
guedoc.*

*Les Propriétaires  
des Salins feront  
les reparations ne-  
cessaires, & à*

*leur refus ou de-  
lay, le Fermier  
les fera à leurs  
despens.*

nez par les guerres, & ceux qui n'en auront point d'en  
edifier de nouveaux où il sera necessaire : Et où lesdits  
Proprietaires ne voudront obeyr apres auoir esté in-  
terpellez, de ce faire sera permis audit Fermier de les  
faire reparer & d'en faire edifier à leurs despens, & à  
ces fins pourra faire saisir & vendre ledit sel, pour y  
employer les deniers, le tout conformément aux Re-  
glemens par nous sur ce faicts, & mesmes contrain-  
dre lesdits Proprietaires d'emboutiquer leurs sels  
nouveaux quinze iours apres qu'ils auront esté leuez,  
& à faute de ce faire ledit Fermier les pourra faire em-  
boutiquer à leurs despens.

## XIV.

*Les Officiers  
seront tenus de re-  
cevoir les mesures  
qui leur seront  
présentées par le  
Fermier.*

Nos Grenetiers, Controlleurs & Visiteurs, Con-  
trollours generaux & leurs Lieutenans, seront tenus  
de recevoir les mesures qui leur seront presentées par  
ledit Fermier ou ses Commis, pour servir tant à la me-  
sure du sel pour la fourniture desdits Greniers, que  
pour la distribution du sel au peuple, en rapportant  
par l'Adjudicataire ou ses Commis les certificats des  
Officiers des Villes où sont establis les Eschantils &  
Estalonnemés Royaux desdites mesures, sans que les-  
dits Officiers puissent de nouveau proceder à vn nou-  
veau Eschantil & Estalonnement, ce que nous leurs  
deffendons à peine de tous despés, dommages & in-  
terests dudit Fermier, & neantmoins pour eüiter les  
abus, qu'il sera fait vn nouveau Eschantil si besoin  
est pour vne fois seulement pendant le temps du pre-  
sent Bail, par les Tresoriers de France desdites Gene-  
ralitez, les Officiers des Villes presens ou deuëment  
appelez,



appelez, Et ne pourront les Officiers qui ont lesdits Eschantils en depost, prendre plus de vingt sols pour leurs assistances & certifications pour chacune mesure de minot, demy & quart à departir entr'eux à peine de concussion & de priuation de leurs gages & droicts, seront tenus d'y vacquer si tost qu'ils en seront requis sur les mesmes peines.

## X V.

DEFFENDONS à nos Officiers des Greniers à sel desdites Fermes, de se mesler ny entremettre en la direction & maniemment des deniers & reuenus desdites Gabelles, si ce n'est du consentement dudit Fermier, Et d'autant que les Officiers de la Ferme de Lyonnois ne font ouuerture desdits Greniers que certains iours en la sepmaine, & par ce moyen les Gabelans sont contraincts de se retirer sans sel, & s'en pourvoir ailleurs de celuy de contrebande, ce qui apporte de grandes diminutions aux ventes au preiudice dudit Fermier: Nous voulons que doresnauant lesdits Officiers fassent ouuerture desdits Greniers chaque iour & vendent le sel: SçAVOIR, depuis le premier Octobre iusques au premier d'Auril de chacune année, depuis huit heures du matin iusques à vnze heures, & de releuée depuis vne heure iusques à quatre, Et depuis le premier iour d'Auril iusques audit iour premier Octobre, ainsi chaque iour depuis six heures du matin iusques à dix heures, & de releuée depuis deux heures iusques à cinq: Et par ce que lesdits Officiers sont en grand nombre à chacun Grenier, & que chacun garde vne clef, ce qui rend impossible de se pou-

*Reglement sur  
la vente du sel en  
la Ferme de Lyonnois.*

noir assembler aux heures pour l'ouuerture desdits Greniers: Nous VOVLONS que lesdits Officiers soiēt tenus de se trouuer ausdites heures pour l'ouuerture desdits Greniers, & à faute de ce, Nous permettons au Fermier, ses Commis ou Receueurs, de faire leuer les cadenats desdits Officiers, apres les auoir interpellēz, Et faisons deffences ausdits Officiers de rien ordonner contre lesdits Fermiers & sesdits Commis pour raison de ce, à peine de suspension de leurs charges & de pertes de leurs gages, N'entendons neantmoins priuer lesdits Officiers de se trouuer ausdits Greniers si bon leur semble apres l'ouuerture d'iceux.

## XVI.

*Exemption de  
Tailles aux  
Commis.*

LES Commis qui seront employez en l'estenduē desdites Fermes pour la direction ou recepte des deniers d'icelles, ne serōt cottisez ny imposez aux Tailles & subsides ordinaires ou extraordinaires desdites Villes, si ce n'est qu'ils fussent domiciliez ou cottisez auparauant leur Commission, & ce durant le temps du present Bail, & qui seront employez à l'execution d'iceluy seulement: Faisant deffences aux Asscurs & Collecteurs de nos Tailles & Subsides, de les asscoir, cottiser & contraindre, à peine de tous despens, dommages & interests.

## XVII.

*Port d'armes.*

LEDIT Fermier, ses Associez & Commis, Capitaines, Archers & Gardes, allans, venans & sejour-nans pour les affaires desdites Fermes, pourront & leurs gens porter toutes sortes d'armes & bastons à feu, & seront exempts de logement de gens de Guer-



re, Gay, Garde & Coruée de Ville, suivant les Ordonnances, ensemble de toute Tutelle, Curatelle, Sequestre, si ce n'est de leurs consentemens.

## X V I I I.

PERMETTONS audit Fermier, commettre tel nombre de Commis pour faire la recepte ausdits Greniers qui bon luy semblera à ses despens, lesquels auront chacun vne clef des Greniers où ils seront establis, Et faisons tres-expresses inhibitions & defences ausdits Officiers de leur donner aucun trouble ny empeschemens, ny les abstraire, & les Gardes desdites Fermes à faire registrer leurs Commissions, prester aucun serment ny exiger d'eux aucunes sommes de deniers pour ce regard directement ou indirectement, à la charge que ledit Fermier en demeurera responsable ciuilement, & qu'il remettra aux Grefes desdits Greniers vn Estat desdits Commis & Gardes sans aucuns frais.

*Permission d'establi-  
r des Com-  
mis aux Gre-  
niers.*

## X I X.

NE sera fait aucune augmentation ny diminution du prix du sel en l'estenduë desdites Fermes, sous quelque pretexte que ce soit, sans le consentement dudit Fermier.

*Le prix du sel  
ne sera augmen-  
té ny diminué.*

## X X.

ET d'autant que depuis quelque temps à cause des augmentations faictes en nos Gabelles, plusieurs de nos Sujets ont recherché par tous moyens de se garantir des impositions d'icelles à nostre preiudice, se seruans des eauës de Fontaines & Estangs sallez & aigueux, s'ingerans mesmes de faire fabriquer du

*Toutes Fontai-  
nes & Estangs  
sallez seront sub-  
mergez.*

fel, qui pourroit causer la ruine entiere desdites Gabelles : Nous faisons tres-expresses inhibitions & deffences à toutes personnes de quelque estat & condition qu'elles soient, de se servir ny faire fabriquer aucunes fontaines ny estangs sallez, à peine de mill liures d'amande contre les contreuenans & d'estre punis suiuant les Ordonnances comme faux sauniers: Et à ces fins permettons audit Fermier de rompre lesdites fontaines, estangs & aigueuseaux, submerger lesdites eauës salées & salins : Enjoignons à tous Seigneurs, Consuls, Officiers, Magistrats des lieux ou sont lesdites fontaines, estangs & aigueuseaux, de tenir la main à l'exécution du present Article sur les peines que dessus, & d'estre responsables des dommages & interests desdits Fermiers.

## XXI.

*Les Officiers  
arrestent & si-  
gnent les Regi-  
s tous les iours*

**Q**UE les Officiers qui se trouueront aux Greniers seront tenus d'arrester & signer les Registres du Commis à la recepte du Grenier à chacun iour d'ouerture, à peine de cinq cens liures d'amende.

## XXII.

*Les Officiers &  
Commis escri-  
uent les Registres.  
& seront les sels  
de Salignons &  
autres faux-sels  
noyez.*

**D**EFFENDONS aux Commis & Officiers d'escrire les ventes ailleurs que sur leurs Registres, pour obuier aux abus, à peine de priuation de leurs charges, comme aussi de s'attribuer les sels de Salignons & autres faux sels qui seront saisis, ains de les faire noyer à la forme de l'Ordinaire, à peine de concussion, despens, dommages & interests dudit Fermier.

## XXIII.

*Le Fermier*

**E**T par ce que nos Officiers desdits Greniers se



sont attribuez l'autorité de pouuoir nommer les *nommera les Ouvriers qui seront employez aux descentes & releuemens des sels.*  
 Ouvriers qui travaillent aux descentes & releuemens de nos sels dans lesdits greniers, au preiudice du Fermier & des Voicturiers: Deffendons ausdits Officiers de cy-apres les nommer ny d'en prendre cognoissance, sinon pour faire le procez ausdits Ouvriers en cas de larcins.

## X X I V.

LE DIT Fermier aura l'entier & libre administration des Greniers de toutes lesdites Fermes, sans qu'il y puisse estre troublé en aucune façon & maniere que ce soit, & sous quelque pretexte que ce puisse estre par nos Officiers & autres quelconques, nonobstant tous Arrests de nostre Conseil, Cour de Parlement, Aydes & Ordonnances à ce contraires, à peine contre les contreuenans de perte de leurs gages, comme aussi pourra decerner ses contrainctes à l'encontre de ses Commis qui auront des deniers desdites Gabelles entre leurs mains, & seront icelles executées par provision, comme pour deniers Royaux, sans prendre aucun mandement de Iustice, pareatis ne permission, nonobstant oppositions ny appellations.

## X X V.

TOUTES les amandes & confiscations qui seront données pour raison desdites Fermes appartiendront audit Fermier, & permis à luy de traicter & composer des saisies & captures comme bon luy semblera, *Les amandes & confiscations appartiendront au Fermier. & pourra traicter & composer d'icelles.*  
 deffendons à tous Officiers & Iuges, d'appliquer lesdites amandes & confiscations ou parties d'icelles, qu'au profit dudit Fermier, & à nos Procureurs gene-

raux, leurs Substituds, & tous autres d'en faire aucune requisition, deschargeant dès maintenant ledit Fermier d'en rendre compte en nos Chambres des Comptes ny ailleurs.

## X X V I.

*Les Officiers  
seront charger pa-  
reille quantité de  
sel qui aura e<sup>te</sup>  
naufragée exē  
pte de tous droits.*

S'IL arriuoit n'aufrage ou perte de sel sur les riuieres du Rhosne & Saône, verification prealablement faicte par les Officiers des lieux plus proches, les Gardes, Contre-gardes & Officiers de nos Salins, en feront charger pareille quantité qui aura esté perduë au naufrage, franche & exempté generallyment de tous droicts, mesmes du droict de blanque & Peages, ainsi qu'il est accoustumé de toute ancienneté, & ne pourront lesdits Officiers desdites Gabelles, iuger aucun naufrage de sel, ny se transporter au lieu où il sera arriué faire aucuns allegemens, sans que ledit Fermier, ses Associez ou Commis soient presens ou appelez, à peine de faux: Et sera le sel restant desdits naufrages estant en Garenne ou sacquerie, remesuré à l'instant afin de verifiser au vray la perte dudit n'aufrage, sans le faire par estimation, la verification & procez verbal, desquels n'aufrages seront faits par lesdits Officiers nostre Procureur appellé, & aux despens dudit Voïcturier.

## X X V I I.

*Les chargemens  
des sels seront  
exēpts des impo-  
sitions fors de ce  
les mentionnées  
en l'article.*

ENIOIGNONS aux Gardes, Contre-gardes & autres nos Officiers desdits Salins, de laisser librement sans aucune difficulté ny retardement, charger telle quantité de sel necessaire pour le fournissement desdites Fermes, laquelle quantité sera tirée de nos Sa.



lins de Peccais, Narbonne & Peyriac, ainsi qu'il est dit au precedent Article, quitte & exempte de tous nos droicts anciens de Gabelles, de toutes creuës, impositions extraordinaires mise & à mettre, tant en nosdits Salins que le long de la Riuere du Rhosne & autres endroiçs & passages, sauf & reseruë le droict de Blanque, cy-deuant accordé aux Proprietaires desdits Salins, les impositions qui se leuent en Peccais, Narbonne, Peyriac & Sejan, & le peage de la Voulte, & pour le regard des huit deniers pour minot pour les peages qui se leuent à Rocquemaure, & encor vn sol pour minot, pour l'imposition de Valance, deux deniers pour minot en la Patte de Roussillon, dite Saint Lambert, huit deniers pour minot de la Gabelle Delphinale qui se paye à Romans, deux sols pour minot à cause du Pontage de Vienne, quatre deniers pour minot au Port d'Anthon, vn denier & demy pour minot au Chasteau de Vitrieu, trois deniers pour minot à Balme, & vn denier & demy pour minot à Iaulnage: Nous deffendons aux Proprietaires de les exiger, & ausdits Fermiers de les payer conformément à l'Arrest de nostredit Conseil du

Mars 1633. & sera employé par chacun an en la despence des Estats de ladite Ferme en deduction du prix du present Bail, la somme de cinq milliers pour l'indemnité du Peage de la Voulte, suivant l'Arrest du Conseil du premier Iuillet 1641.

### XXVIII.

IOUYRA ledit Fermier des fournissemens des greniers & chambres desdites Fermes, sans qu'ils puissent *Le Fermier jouyra du four-*

*ni semēt des Greniers & Chambres.*

estre baillez ny diuisez de ladite Ferme en quelque sorte & maniere que ce soit, pour quelque aduantage qui se puisse presenter, sans le gré & consentement dudit Fermier, Et deffendons à tous nos Officiers de luy donner aucun trouble ny empeschement, à peine de tous despens, dommages & interests: Et à cēt effet pourra prendre des sels es Salins de Peccais, Narbonne & Peyriac, de tels Proprietaires que bon luy semblera, pour le fournissement desdits greniers, sans qu'il puisse estre tenu d'observer le tour du Rollen ny aucuns contractz faicts entre lesdits Proprietaires, lesquels demeureront cassez & annullez comme preiudiciables au Fermier & au public, & les greniers & Chambres desdites Fermes seront fournies de sels qui se tireront de Peccais & Narbonne.

X X I X.

*Injonction à tous Iuges de faire deliurer tous batteaux, cheuaux & charrettes pour la voicture des sels.*

LES Gouverneurs Baillifs, Seneschaux, leurs Lieutenans & tous autres, nos Officiers & Iuges, seront tenus de faire deliurer audit Fermier, ses Associez & Commis des charrois, batteaux & bestes de voictures necessaires pour la voicture du sel à la premiere requisition qui leur en sera faite, & y feront contraindre lesdits Charretiers, Voicturiers & autres qu'il appartiendra, nonobstant oppositions ou appellations quelconques, en payant de gré à gré ou suiuant la taxe qui en sera faite par nos Officiers desdites Gabelles, ayant esgard au prix que l'on paye pour la voicture d'autres marchandises, le tout à peine de respondre en leurs propres & priuez noms des dommages & interests dudit Fermier, & de la perte de nos droicts.



## X X X.

LEDIT Fermier & ses Associez pourront acheter & transporter les bleds, vins, toilles, chanures, auoynes & autres choses qui leur seront necessaires pour la nourriture des hommes & cheuaux qui serviront au tirage desdits sels, suiuant le Reglement cy-deuant fait, & aussi faire transporter les deniers qui leur serot necessaires pour l'achapt desdits sels, payemens des voictures & peages sans en abuser à peine d'en respondre en leurs propres & priuez noms, en prenant toutesfois passe-port des Gouverneurs de nos Prouinces ainsi qu'il est accoustumé.

*Permission d'acheter & transporter toilles, argent & autres choses necessaires pour la voicture des sels.*

## X X X I.

TOUTES choses necessaires pour la voicture & commerce desdites Fermes, seront franches de tous peages, Doüannes, impositions, fors que des anciens qu'ils payeront ainsi qu'ils ont accoustumé, sans que les Seigneurs Peagers, Fermiers desdites Doüannes, impositions & autres les puissent contraindre aux payemens d'iceux, à peine contre lesdits Seigneurs de la perte de leurs peages, & contre lesdits Fermiers de concussion, & de trois mil liures d'amende: Deffendons tres-expressément aux Proprietes & Fermiers desdits peages & leurs Commis, de contraindre lesdits Voicturiers, & faire prendre terre à leurs barques, attendu qu'ils ne le peuuent qu'avec peril & grande perte de temps, bien pourront iceux Peagers si bon leur semble, se faire porter par bateaux, pour faire visiter lesdites barques & recognoistre s'il y a aucune fraude, auquel cas seront lesdits

*Les choses necessaires pour la conduite des sels serot exemptes de toutes impositions peages & doüannes.*

*Deffences sont faictes aux peagers de faire prendre terre aux barques.*

Voiçturiers condamnez fuiuant 'la rigueur des Ordonnances.

X X X I I.

*Les Gardes & contre gardes des salins feront des chargemens sans aucun delay.*

LES chargemens des sels necessaires pour le four-  
nissement desdites Fermes, seront faits à la maniere  
accoustumée, ou en barriques & sacquerie, & ne  
pourra ledit Fermier estre abstrainct de couvrir &  
cadenasser les batteaux & barques chargées dudit sel.  
ENIOIGNONS ausdites Gardes & contre-gardes de  
nosdits Salins, faire faire les chargemens des susdits  
sels necessaires sans aucun delay ny retardement à la  
premiere requisition qui leur en sera faicte par les  
Voiçturiers, fuiuant les Lettres de deschargemens  
qui leur seront enuoyées par ledit Fermier ou autres  
ayans droicts & charges d'iceux : ENIOIGNONS  
aussi ausdites Gardes de faire charger ausdits Voiçtu-  
riers la quâtité de sels qui sera portée par leurs Lettres  
de chargemens, & outre ce le déchet ordinaire qui  
est du muid la mine, en payant le sel au Propriétaires  
ausquels ne sera payé aucune chose pour ledit déchet,  
afin qu'ausdits deschargemens lesdits Voiçturiers  
puisse rendre ce qui sera porté par leur Police, pour  
éuiter aux grands abus que les Voiçturiers com-  
mettent en chemin, Et sera permis audit Fermier de  
prendre de nos Salins tels sels que bon luy semblera  
pourueu qu'ils soient surannez au prix qui sera con-  
uenue sans estre tenu d'observer ledit tour du rolle,  
dans lesquelles lettres de chargemens, lesdites Gardes  
& contre-gardes feront mention distinctement du  
nombre des minots, sacs, ou barriques qui seront

*Le Fermier ne sera tenu d'observer le tour du rolle.*



chargées pour la fourniture des Greniers de ladite Ferme, & par lettres de Police qu'ils expedieront aux Officiers des greniers d'entrepôts, ou les deschargemens se doiuent faire, endosseront la reception des sels, & en donneront certificat aux Voïcturiers pour leurs descharges sans que ledit Fermier soit tenu si bon ne luy semble, d'empescher ny mesurer ledit sel ausdits entrepôts, ains ausdits greniers, pour lesquels il sera destiné pour éuiter multiplicité des mesurages & deschets.

### XXXIII.

NE pourra estre fait aucunes saisies par les creanciers des Voïcturiers entre les mains dudit Fermier pour ce qu'ils leur pouroient deuoir pour l'achat desdits sels voïctures, peages & impositions, attendu qu'ils sont payez par aduance lors qu'ils vont ausdits deschargemens, & que si lesdites saisies auoient lieu les greniers demeureroient sans fourniture, & pourra ledit Fermier faire faire les voïctures par ceux qui luy en feront la condition meilleure.

*Ne sera fait aucune saisie des sels.*

### XXXIV.

ET d'autant qu'il nous est fait plainte en nostre Conseil, que nos Officiers desdits Salins, font de grandes exactions sur les Fermiers & Voïcturiers lors des chargemens des sels sur ce qu'ils les veulent astringre de rapporter permission des Tresoriers de France pour faire lesdits chargemens, ou de payer leur taxation, au moyen dequoy ils tiennent en longueur lesdits Fermiers & Voïcturiers pour lesdits chargemens, & les consomment en frais : Nous en-

*Injunctiō aux Officiers des Salins de charger promptement les sels nonobstant qu'ils n'ayent la permission des Tresoriers de France.*

joignons ausdits Officiers desdits Salins, de promptement & sans delay, charger ou permettre d'estre chargé la quantité de sel qui sera contenue par les lettres de chargement dudit Fermier ou autres ayans à luy pourvoir, nonobstant qu'ils n'ayent permission desdits Tresoriers de France, dont nous les auons dispensé par nos Lettres patentes du sixième Feurier mil six cens dix, sauf ausdits Tresoriers de France à chaque commencement d'année, de faire le departement du sel desdits Salins, à peine de tous despens, dommages & interests, que ledit Fermier ou Voicturiers pouroient souffrir pour leur retardement, leur defendons neantmoins de charger ny permettre d'estre chargé esdits Salins sans lettres dudit Fermier aucuns sels pour estre debité & vendu en l'estenduë desdites Fermes : Enjoignons ausdits Officiers de trauailler sans discontinuation ausdits deschargemés, sans observer la quantité reglée comme ils faisoient auparavant, lesquels Officiers seront payez à l'instar de ceux des Gabelles de France, sans qu'ils puissent estre augmentez pour aucuns des nouveaux Officiers que nous y pourrons establir, pourueu toutesfois qu'ils n'ayent financé pour auoir plus grands droicts que ceux de France.

## X X X V.

*En cas de penurie de sel, pourra le Fermier debiter le sel nouveau six sepmaines apres.*

EN cas de necessité & penurie de sel vieil en nos Salins, Nous permettons audit Fermier de debiter le sel nouveau six sepmaines apres qu'ils sera leué & mis en moulon & cauelle.



## X X X V I.

NE pourront les Propriétaires des Salins dépendans de toutes lesdites Fermes, faire aucuns dons de sel, ny iceluy bailler en payement des despences nécessaires pour la leuée desdits sels, à peine de trois cens liures, & pour cét effet faisons deffences à toutes personnes d'achepter lesdits sels desdits Propriétaires sur les mesmes peines: Et d'autant qu'il nous a esté fait de grâdes plaintes des larcins des sels qui se commettent és marets en les façonnans, aux chargemens & deschargemens des tombereaux, charrettes, barques & batteaux, au transport, voictures & enfermement d'iceux, dans les entreposts & emboutiquemét, Nous voulons qu'il soit procedé contre les coupables par amende & punition corporelle, desquelles amendes, lesdits Propriétaires demeureront responsables.

*Les Propriétaires des Salins ne pourront faire aucun don de sel ny le bailler en payement.*

## X X X V I I,

QUE les Gabelots & Capoliers vseront de la diligence nécessaire à la voicture dudit sel & fourniture desdits greniers, sans en iceluy faire aucune retention, sur peine d'estre punis suiuant les Ordonnances.

*Les sels seront voicturez en diligence.*

## X X X V I I I.

ET pour éuiter tous les abus, permettons audit Fermier de mettre des ferrures en tous les Magasins & entreposts des Salins desdites Fermes, tenir vne clef d'iceux, sans que lesdits Propriétaires en puissent faire ouuerture qu'en la presence dudit Fermier ou autres ayans de luy charge: Et neantmoins auoir vne

*Permission de mettre des Ferrures à tous les magasins & entreposts.*

ou deux fregattes pour veiller sur lesdits larcins, visiter les barques & nauires si besoin est, establir des Gardes ausdits Salins & autres lieux ou bon luy semblera, & faire toutes autres recherches appelez les Officiers competans à ses despens sans en abuser; le tout conformément à nos Ordonnances & Reglemens de nos Gabelles.

## X X X I X.

*Permission de  
faire bastir des  
maisons es Salins*

PERMETTONS audit Fermier faire bastir maisons pour le logemēt des Gardes & conseruation des sels à nos despens, pouueu que la despence n'excede cent escus, laquelle despence sera déduite du prix de ladite Ferme sur le dernier quartier du prix de ladite Ferme sur le dernier quartier de l'année prochaine mil six cens quarante-cinq: Outre ce pourra faire ledit entrepost ou bon luy semblera dans ledit pays, pour y debiter le sel à la mesure & prix ayant cours: Et à la fin du present Bail, les sels restans dans lesdits entreposts seront à nous comme ceux des greniers, en les payant comme dit est, & à ces fins baillera rolle, & declaration des entreposts & mesures qui seront par luy reestablis.

## X L.

*Deffences d'en-  
leuer aucun sel  
ny le vendre à  
l'Estranger sans  
le consentement  
du Fermier.*

FAISONS deffences à toutes personnes de leuer aucune quantité de sel desdits Salins en façon que ce soit, sans la permission de nos Officiers & consentement dudit Fermier ou autre ayant charge de luy, ny d'en vendre en l'estenduë de sa Ferme ny à l'estranger à peine de confiscation du sel, barques, charrettes, mulets, & de punition corporelle suiuant nos Ordonnances.



## X L I.

T O V S Patrons de Vaisseaux & Barques chargées de sel, venant des terres estrangeres ou de nos Salins qui arriueront aux Ports & Haures de la coste de la Mer, seront tenus d'appeller ledit Fermier ou l'un de ses Commis, à peine de confiscation & d'amende arbitraire, & pour les autres charges de Marchandises qui arriueront ausdits Ports & Haures de l'estendue desdites Fermes, ne pourront user d'autres sels que de celui qu'ils prendront en nos greniers, ou des Regrattiers sur pareille peine.

*Les barques chargées de sel arriuant aux costes de la mer appelleront le Fermier, & ceux chargés de marchandise se serviront du sel aux greniers.*

## X L I I.

P O U R remedier aux grandes plaintes qui nous ont esté faictes de plusieurs larcins faits par les Mesureurs, Renuerleurs & Porteurs de sel, & autres gens traueillans à la descharge des barques & batteaux en nos Villes de Narbonne, S. Esprit, Lyon & autres Villes & endroicts de l'estendue desdites Fermes, où il se fait mesurage & deschargemens de sel: Nous voulons qu'il soit procedé contre les coupables, tant par amende que par punition corporelle.

*Pour remedier aux larcins qui se font aux chargemens & deschargemens du sel.*

## X L I I I.

Q V' I L ne sera pris, saisi ny arresté aucuns mulets ny bestial seruans à la voicture des sels sous quelque pretexte que ce soit, pour laisser ladite voicture de sel libre.

*Le bestail servant au charroy du sel ne pourra estre saisi.*

## X L I V.

N O V S Faisons tres-expresses inhibitions & defences aux Soldats de la Garnison de Peccais de se mesler directement ou indirectement des charge-

*Defences aux soldats de la garnison de Peccais, & la rouissance de la Tour Labbé.*

mens des sels, empescher le passage des barques dudit fort, soit en allant charger du sel ou reuenant, ny exiger aucune chose des Patrons & Mariniers, à peine de punition corporelle : Et voulons que la Tour Labbé, qui a esté bastie par les precedens Fermiers pour la garde & conseruation des Salins, soit mise au pouuoir dudit Fermier, pour le logement des gardes par luy employez à la conseruation desdits Salins, conformément à l'Article vnzième du Reglement general des Gabelles du vingt-fixième Ianuier mil six cens vn.

## X L V.

*Le Fermier  
pourra visiter ou  
faire visiter tous  
batteaux mon-  
tans la riuere  
pour recognoistre  
s'il y aura quel-  
que sels ca-  
chez sous prete-  
xe de marchan-  
dise.*

S E R A loisible audit Fermier, ses Associez & Commis à leur peril & fortune, & sans en abuser, visiter ou faire visiter les batteaux vuides ou chargez montans le long de ladite riuere, pour recognoistre s'il y aura quelques sels cachez en iceux ou meslez sous quelques autres marchandises, & s'il s'en trouue, sera procedé à la confiscation tant desdits batteaux que marchandises, sous lesquels ledit sel se trouuera, & ce par nos Officiers desdites Gabelles, nostre Procureur ledit Fermier ou ses Associez & Commis, appelez & ouys conformément à nos Ordonnances & Reglemens de nostre Conseil sur ce interuenus.

## X L V I.

*Mettra tel  
nombre de Gar-  
des qu'il voudra  
sur les frontieres.*

N O V S permettons audit Fermier de mettre tel nombre de Procureurs, Capitaines & Gardes qu'il aduifera bon estre sur les frontieres & en toute l'estendue desdites Fermes, pour empescher l'entrée du faux sel en icelles & courses des faux-sauniers, lesquels



quels Procureurs, Capitaines & Gardes, pourront faire toutes visites, captures, arrests par tout où ils se doubteront auoir esté mis des sels de contrebande & non gabellé, mesme en cas d'aduis de fraude, pourront faire des visites chez les personnes Ecclesiastiques, en ce faisant assister des Officiers des lieux, & pourueu qu'ils obseruent les Arrests & Reglemens sur ce faicts en nostre Conseil, comme aussi saisir les batteaux, cheuaux, charrettes, mulets & armes dont ils feront procez verbaux, lesquels incontinent avec les choses saisies, ils feront tenus presenter aux Officiers desdites Gabelles, pour en faire la punition suivant la rigueur des Ordonnances.

*Lesdits Gardes pourront faire toutes visites, captures, arrests & saisies.*

*Pourront faire visites chez les personnes Ecclesiastiques*

#### XLVII.

Tous Gentils-homme ou autres personnes priuilegiées vsans & negocians du sel de contrebande, fauorisans ou recelans les faux-sauniers apres deuës verifications faictes seront descheuz de leurs priuileges & tiltres de Noblesse, & outre ce condamnez en l'amende & punis comme infracteurs de nos Ordonnances.

*Tous Gentils-hommes vsans ou fauorisans l'usage du sel de contrebande, priuez du tiltre de Noblesse.*

#### XLVIII.

Tous differends qui naistront entre lesdits Fermiers & les particuliers seront iugez en premiere instance par les Visiteurs generaux & autres Officiers desdites Gabelles, & par appel en nos Cours des Aydes, sauf si pour quelques causes ou considerations nous iugeons que nostre Conseil en doieue cognoistre.

*Les Iuges des Gabelles cognoistront des differends en premiere instance, & par appelés Cours des Aydes.*

*Les Reglemens  
du Conseil & des  
Visiteurs sur le  
versement des sels  
seront executez,  
nonobstant les  
Arrests des Cours  
Souveraines.*

LES Reglemens cy-deuant faicts en nostre Conseil & par nos Visiteurs generaux, pour éviter & obvier aux versemens des sels qui se font ordinairement aux frontieres desdites Fermes, seront suiuis & executez nonobstant tous Arrests de nos Cours de Parlemens & Aydes, & Ordonnances à ce contraires, que nous auons reuoqué & reuoquons: Et faisons deffences à tous Gouverneurs & autres Officiers, d'apporter aucun empeschement à l'execution desdits Reglemens, à peine de dix mil liures d'amande & de suspension de leurs charges.

L.

*Deffences de fai-  
re saller les chairs  
ou poissons hors de  
l'estenduë de la  
Ferme.*

DEFFENCES sont faictes conformément à nos anciennes Ordonnances, à tous Marchands & autres d'aller aux lieux ou la Gabelle n'est establie, pour faire saller la chair & poisson des sels non gabellé, à peine de confiscation & de cent liures d'amende.

L I.

*Les Gardes &  
Archers pourront  
donner toutes as-  
signations.*

LES Commis, Capitaines, Gardes & Archers qui seront establis par ledit Fermier, pourront assigner pardeuant nos Officiers des Gabelles, les contreuenans à nos Ordonnances, Arrests & Reglemens sur ce faicts pour lesdites Gabelles, Et seront tenus les Commis, Capitaines, Gardes, Archers & tous autres qui procederont aux visites & recherches, de remettre leurs procez verbaux & informations au Greffe des Officiers qui doiuent cognoistre desdites Gabelles.



## L I I.

QV E les Preuosts des Mareschaux ou leurs Lieutenans pourront s'ils en sont requis par ledit Fermier ou les Commis informer, & par preuention instruire les procez, & faire les captures des faux-sauniers, & autres delinquans au fait des Gabelles, à la charge toutesfois de faire porter les procez aux Visiteurs generaux pour les iuger avec eux ou autres qui seront par nous commis.

*Les Preuosts  
pourront instrui-  
re les procez con-  
tre les faux sauniers.*

## L I I I.

ET par ce qu'en aucunes Villes ou les Greniers sont establis, les Consuls & Habitans d'icelles prennent & leuent certain droict qu'ils font joindre aux prix de nos Greniers à la foule & charge de nostre peuple, Nous leurs deffendons de prendre doresnauant aucun droict sur peine de punition corporelle, cassant & reuoquant dès à present les permissions qu'ils en pourroient auoir cy-deuant obtenues, sans qu'ils s'en puissent plus seruir ny ayder, excepté les Octroys que nous auons concedez, & ceux que nous pourions conceder aux Villes & Communautez dont ils jouyront plainement & paisiblement sans diminution du prix du present Bail.

*Deffences aux  
Communautez  
ou sont les Gre-  
niers de leuer au-  
cun droict sur le  
sel & reuocation  
des permissions  
par eux obtenues*

## L I V.

ET d'autant que nous sommes aduertis que les habitans de la Ville Daiguemortes & autres Communautez, prennent toutes les années vne grande & excessiue quantité de sel pour leurs prouisions plus qu'ils n'en scauoient vser, & que sous ce pretexte ils commettent beaucoup d'abus au preiudice de nos

*Reglement pour  
le franc salie  
Daiguemortes*

Gabelles, pour à quoy remedier, Nous voulons que par les Tresoriers de France de Montpellier, ou autres Commissaires qui seront par nous deputez, il soit informé de la quantité du sel necessaire ausdits Habitans pour leurs prouision annuelle, pour ce fait & rapporté en nostre Conseil y estre pourueu ainsi qu'il appartiendra, & sera l'Arrest du Conseil du quatorzième iour de Feurier mil six cens quarante. trois, concernant la quantité des sels que les Habitans de ladite Ville leuent de Franc-sallé annuellement, executé selon sa formé & teneur.

## L V.

*Le Fermier  
ne pourra estre  
contrainct payer  
aucunes espices ny  
fraiz de procez,  
s'il n'est partie en  
iceux,*

ET pour remedier aux plaintes qui nous ont esté faictes par ledit Fermier & autres precedens Fermiers desdites Fermes, que nos Grenetiers, Controlleurs, Visiteurs & Controlleurs generaux & leurs Lieutenans, font d'ordinaire des procez à diuers particuliers à la requeste de nos Procureurs ausdites Gabelles, & apres desliurent des contrainctes contre les Fermiers pour le payement des espices & autres fraiz: Nous deffendons ausdits Officiers de faire aucunes taxes ny decerner aucunes contrainctes contre ledit Fermier, pour les Iugemens & frais des procez qui seront par eux iugez s'il n'est partie en iceux en qualité de demandeur ou deffendeur.

## L V I.

*Les Gabelans  
prendrôt billetes.*

NOUS enjoignons à tous Gabelans, soit Regratiers ou autres, de prendre billetes des Receueurs & Controlleurs de chacun Grenier de la quantité de sel qui leur sera desliurée en iceux, à peine de confisca-



tion de tous les sels qui seront trouvez dans les billetes.

### L V I I.

Nous permettons audit Fermier de se pourvoir pour l'instruction & Jugement des faux-sauniers, pardeuant les Officiers desdits Gteniers, auxquels la cognoissance en appartient, & en cas de conuiuence d'iceux pardeuant les Officiers des plus proches Greniers, & autres Officiers Royaux sur les lieux à son choix & option.

*En cas de conui-  
uence des Offi-  
ciers, le Fer-  
mier se pouruoirà  
pardeuant d'au-  
tres Officiers à son  
choix & option.*

### L V I I I.

Et d'autant que plusieurs personnes sous pretexte des priuileges que nous leur accordons pour faire le salpestre & verreries, commettent plusieurs abus en la vente qui se fait du sel qu'ils tirent à l'occasion dudit salpestre & verreries qui diminuë d'autant la vente des sels desdites Fermes: Nous faisons deffences tres-expresses à tous Salpestriers & Verriers, de faire aucunes cuittes dudit salpestre & verres, qu'à mesme temps ils ne jettent le sel qui en sera tiré dans autres chaudieres dudit salpestre, à peine de dix mil liures d'amende, & de perte de leurs Priuileges, & sur les mesmes peines de faire aucunes ventes dudit sel, ny de faire aucuns falegres: Enjoignons aux Officiers de nos Gabelles d'y tenir la main priuatiuement à tous autres Iuges, qui pourroient estre commis pour ledit salpestre.

*Reglement con-  
tre les Salpestriers*

### L I X.

La feuille des Gabelles par nous cy-deuant establie dans la Ferme des Gabelles de Lyonnois, sera ob-

*La feuille des  
Gabelles sera ob-*

*seruée en l'esten  
due de la Ferme  
de Lyonois.*

seruée dans tous les Greniers d'icelle, nonobstant tous Arrests contraires, mesmes ceux donnez par nostre Cour de Parlement de Dijon: Enjoignons aux Officiers desdits Greniers, de faire prendre ladite feuille des Gabelles, & aux Gabelans de la prendre à peine de cent liures d'amende, & autres arbitraires, & d'estre traictez comme faux-sauniers, comme aussi enjoignons aux Greffiers des Parroisses des ressorts desdits Greniers, de remettre annuellement entre les mains des Commis & Receueurs desdites Fermes, coppies des rolles des Tailles desdites Parroisses, pour y former leur secte, à peine de cent liures d'amende.

## L X.

*Les amandes  
de 25. liures don-  
nées contre les de-  
linquans seront  
executées nonob-  
stant appel.*

ET d'autant que par trop d'indulgence des Officiers enuers les faux-sauniers, ils ne les condamnent bien souuent qu'en de petites amandes qui leur donnent sujet par ceste impunité de continuer lesdits Faux-saunages, mesmes à present à cause de la grande inégalité du prix des sels d'une Prouince à l'autre, Nous voulons que les peines des Edits & Ordonnances contre les delinquans ne puissent estre arbitrées ny moderées que suiuant & conformément à nostre Declaration du mois d'Auril mil six cens trente-neuf verifiée ou besoin a esté: Enjoignons à nos Officiers de la garder & obseruer, à peine de tous despens, dommages & interests dudit Fermier, & d'en respondre en leurs propres & priuez noms.

## L X I.

*Tous pretendus  
exçpts de droicts*

ET par ce que plusieurs personnes pretendent l'exemption de nos droicts de Gabelles, sous pretexte



de certains priuileges qu'ils supposent en auoir obtenus, Nous leur enjoignons de rapporter dans trois mois à nostre Conseil du iour de la signification qui leur sera faiète du present Article à personne ou domicile, les tiltres en vertu desquels ils pretendent lesdites jouyssances, pour iceux veuz & rapportez audit Conseil estre ordonné ce que de raison, à faute dequoy faire ledit temps passé, ils payeront lesdits droicts.

*de Gabelles rapporteront au Conseil leurs tiltres dans trois mois.*

## L X I I.

Nous permettons audit Fermier sans pour ce demander autre Commission que le present Article, de rembourser les Regrattiers desdites Fermes de Lyonnois & Languedoc, suiuant les Arrests sur ce donnez, comme aussi les Mesureurs & Palayeurs de la Finance de leurs Offices, & de commettre ausdits regratages & mesurages telles personnes que bon luy semblera, en prestant le serment pardeuant les Officiers desdites Gabelles, ausquels nous deffendons d'y donner aucun trouble ny empeschement, à peine de mil liures d'amende, & de suspension de leurs charges, & sans que nous puissions faire réuendre lesdits regratages & mesurages pendant le temps du present Bail ny en establir de nouueaux: Et ce faisant ledit Fermier jouyra des droicts y attribuez ainsi qu'en ont jouy les precedens Fermiers & Proprietaires desdits Offices.

*Permission de rembourser les regrattiers, mesureurs & Palayeurs de leurs Finances.*

## L X I I I.

Q'V'IL ne pourra estre estably aucun entrepost de sel & regratages és Pays de Franc-sallé à cinq lieues

*Aucun entrepost ne sera fait à*

*cing lieues pres  
des limites de la  
Ferme.*

pres des limites desdites Fermes, sous quelque pre-  
texte que ce soit, ains seront les ventes & entreposts  
reculez & establis és lieux qui seront iugez plus pro-  
pres par les Officiers des Cours des Comptes, Aydes  
& Finances de Montpellier, Clermont-Ferrand & Ca-  
hors, chacun dans son d'estroit comme il se pratique  
en Auvergne, qui est de Franc fallé: Et seront faiçtes  
deffences aux Habitans desdits pays d'y contreuenir  
à peine de cinq cens liures pour la premiere fois, & de  
punition corporelle pour la seconde: Et enjoint aux  
Consuls & Officiers des lieux, de tenir la main à l'exe-  
cution du present Article, à peine d'en respondre en  
leurs propres & priuez noms, & de priuation de leur  
franc-fallé.

#### L X I V.

*Les Peages  
d'Auignon &  
Orange seront  
payez en argent.*

LES Peages d'Auignon & Principauté d'Orange  
seront payez ainsi qu'ils ont esté payez par les prece-  
dens Fermiers suiuant les Arrests & Reglemens, &  
par ce que l'Euesque d'Alby Fermier de nostre Com-  
té de Castres & plusieurs autres, pretendent auoir cer-  
tains droicts de Leaude ou Estallages en essence des  
sels, Nous leurs enjoignons d'apporter en nostre  
Conseil leurs tiltres & papiers concernans les susdits  
droicts par eux pretendus, pour en estre payé en ar-  
gent suiuant la liquidation qui en sera faiçte, eu es-  
gard au prix du sel qui se payoit lors de la concession;  
Et cependant leur faisons tres expresses deffences d'u-  
ser d'aucunes contrainctes contre ledit Fermier, à  
peine de dix mil liures d'amende, & à tous Iuges &  
Officiers d'en decerner sur lesdites peines, & de sus-  
pension

*L'Euesque d'  
Alby Fermier du  
Comté de Castres  
& autres preten-  
dans droicts de  
Leaude ou Estal-  
lages apporteront  
leurs tiltres &  
cependant deffen-  
ces de leuer lesdits  
droicts.*



pension de leurs charges, & pour ce qui est des Comtes de Saint Jean de Lyon, jouyront de leurs droicts de Leaude, ainsi qu'ils ont bien & deuëment faits cy-deuant, à raison de quatre-vingts seize minots par chacun an.

## L X V.

LE DIT Fermier ne sera tenu de compter du prix desdites Fermes en nos Cours des Comptes ny ailleurs que de trois en trois ans, qu'il payera le prix d'icelles és mains des Tresoriers de nostre Espargne, suivant les Estats qui seront arrestez en nostre Conseil, & en fin desdites trois années, il en rendra compte en nostre Chambre des Comptes de Paris, pour le prix de la Ferme, & pour les charges és Chambres des Comptes de Paris & Languedoc, & à ces fins luy sera laissé fonds pour les espices, façon & reddition desdits comptes ainsi qu'és Estats precedens.

*Le Fermier ne comptera que de trois en trois ans.*

*Sera laissé fonds pour les espices, façon & reddition des comptes.*

## L X V I.

DEFFENDONS aux Tresoriers de France des Bureaux des Finances de l'estenduë desdites Fermes, d'ordonner ny disposer des deniers desdites Gabelles, sur peine d'en respondre en leurs propres & priuez noms, & de contraindre les Fermiers à bailler autres Cautions que celles qui auront esté par eux fournies en nostre Conseil sous quelque pretexte que ce soit, à peine de dix mil liures d'amende contre les ordonnateurs.

*Deffences aux Tresoriers de France de disposer des deniers des Gabelles.*

## L X V I I.

Q V E les payemens des gages des Officiers des Greniers seront faits par ledit Fermier, & non par le Receueur & Payeur deldits gages, comme il se prati-

*Gages des Officiers des Greniers seront payez par le Fermier.*

que aux Fermes des Gabelles de France.

L X V I I I.

*Les Bateliers  
seront tenus de  
cadenasser leurs  
barques toutes les  
nuicts.*

S E R A enjoint à tous Batteliers tant sur la riuere du Rhosne qu'autres riuieres qui sont dans l'estenduë & aux limites desdites Fermes, de mettre des cadenats à leurs batteaux pour estre fermez à clef la nuict, à faute de ce faire, il sera permis aux Gardes dudit Fermier de rompre lesdits batteaux, & les Batteliers condamnez en des amandes arbitraires aux Iuges: Comme aussi Nous permettons audit Fermier de mettre des cadenats la nuict aux batteaux de chaque Port, pour empescher les trajets & versemens de sel que lesdits Batteliers font de nuict d'une Prouince à l'autre, & passage de Faux-sauniers.

L X I X.

*Le Fermier ne  
sera tenu de rem-  
bourser à Riquier  
que le p<sup>x</sup> des sels  
qu'il trouuera  
aux greniers &  
chambres trois  
mois apres les re-  
mesurages.*

L E D I T Iannon entrant esdites Fermes ne sera tenu d'aucune chose enuers ledit Riquier, sinon du remboursement du prix des sels qui seront trouuez aux Greniers & Chambres desdites Fermes, au premier Iuillet prochain, dont ils conuiendront de gré à gré, sinon au dire de gens à ce cognoissans, & sera tenu faire le payement du prix & voicture desdits sels dans trois mois apres les remesurages.

L X X.

*Sera fait nou-  
uelle Brassiere al-  
lant de celle des  
Mariez en Pec-  
cais au lieu de cel-  
le allant de Sau-  
ueréal audit Pec-  
cais.*

E T d'autant que l'ancienne Brassiere allant de Sauueraux en Peccais, est tout a fait comblée & inutile sera ledit Fermier obligé de fournir & aduancer les deniers qui seront necessaires pour la construction d'un nouveau canal ou brassiere de huit thoises de largeur allant de la brassiere des Mariez en Peccais,



au lieu & endroiēt designé par le sieur le Camus, cy-deuant Intendant de Iustice en Languedoc, & pour dōner vuidange audit canal en sorte que l'eau passant dans ladite Brasserie, ait son cours libre pour se descharger dans la mer, ledit Fermier fera ouurir le gras de la mer, sans quoy ladite nouvelle brassiere se combleroit dans peu de temps, de laquelle ouuerture & vuidange de ladite brassiere, les ouurages & trauaux seront donnez & adiugez au rabais & moins disans par les Intendans de Iustice, Police & Finance de ladite Prouince, & deux Tresoriers de France de Montpellier, qui seront à ce commis & deputez, & les Baux qui seront par eux faits, veus & validez au Conseil, & les deniers necessaires pour lesdits ouurages & trauaux, ensemble pour la recōpense des terres & heritages qu'il conuiendra prédre pour ladite nouvelle brassiere, dont la liquidatiō sera aussi faite par lesdits Intendans & Tresoriers de France, & en suite validé au Conseil, ledit Fermier sera remboursé sur ce qui prouiendra de la creuë & leuée des sept sols six deniers, imposez par doublement depuis l'année mil six cens quarante-deux, & affectez pour la non-jouissance des droiēts des Lieutenans des Controlleurs Conseruateurs desdites Gabelles de Languedoc a present reduits au denier quatorze de leur finance, & laquelle creuë qui deuoit cesser incontinant apres que ledit Proprietaire auroit esté remboursé desdites non-jouissances, sera continuée iusques à concurrence des sommes auxquelles se trouueront monter lesdits ouurages & recompenses de terre, avec l'inte-

*Creuë des six  
sols six deniers  
pour minor sera  
continuée.*

rest sur le pied du denier dix, la leuée & perception de laquelle creuë, sera faicte par les mains dudit Fermier, dont il comptera au Conseil & non ailleurs, pour raison dequoy, tous Arrests, Commissions luy seront deliurées, & demeureront reuoz tous autres Traictez qui pourroient auoir esté faicts pour raison de ladite Brassiere.

## L X X I.

*Introduction du  
sel en Suisse, Sa  
uoye, Geneve &  
Alliez.*

P O U R le regard des Traictez, Introductions & Fournissemens de sel aux Pays & Ligues de Suisses, leurs Alliez, Valley, Sauoye, ville de Geneve & ailleurs, pour ce qui se fournira par la riuere du Rhosne, elles seront faictes par ledit Fermier, lequel sera tenu fournir des Salins de Peccais ou autres marais salans en France en l'estenduë desdites Fermes, les quâtitez de sel necessaire aux Ligues & Cantons Suisses, Pays de Valley ou leurs alliez à Morgues où à Geneve au choix dudit Fermier, lequel à cét effet, sera tenu d'establiir des magasins suffisans proche de la frontiere, ainsi qu'il a esté faict par le precedent Fermier, & seront tenus lesdits de Sauoye & Suisse, declarer au commencement de chacune année la quantité de sels qu'ils desireront pour leurdit fournissement, laquelle estant entrée dans les entreposts pour ce establis, seront tenus de payer les prix desdits sels pour toute ladite quantité déclarée, & pour seureté dequoy ledit Fermier donnera bonne & suffisante caution de faire lesdites fournitures au temps & prix qui sera conuenue, en baillera aussi par eux audit Fermier bonne & suffisante caution du payement dudit



prix, conformément au Traicté faict avec nous par Estienne Desthots, le dernier Decembre 1627. & si dás lesdits Pays arriuait quelque difficulté soit en general ou en particulier sur le sujet de ladite Introduction, Nous interposerons nos Officiers & nostre auctorité par nostre Ambassadeur, pour l'assistance dudit Fermier, soit pour la vente ou debit du sel, ou pour le recouurement de nos deniers,

## L X X I I.

N E sera ores ny pour l'aduenir ledit Fermier compris aux compositions & taxes qui se feront sur les Officiers comptables, Fermiers ou autres pour l'extinction de la Chambre de Iustice, ou autres taxes preueües & non preueües, sans laquelle clause expresse ledit Fermier, ses Associez & Cautions n'entreront au present Bail.

## L X X I I I.

S I durant le present Bail il arriuait peste, guerre, ou famine, ou autres empeschemens, au moyen desquels les Salins & Greniers fussent saisis, & les voictures empeschées, & autres notables inconueniens audit cas, & lors d'iceux presentant sa requeste en nostre Conseil, luy sera faict tel rabais & diminution qu'il sera par nous aduisé en nostredit Conseil.

## L X X I V.

P O V R R A ledit Fermier associer qui bon luy semblera au present Bail, soit Nobles Officiers de Cours Souueraines, Finances & autres sans déroger à Noblesse, ny en pouuoir estre recherchez nonobstant les Ordonnances, dont nous les auons dispensé & dispensons pourueu que pendant le temps du pre-

*Le Fermier ne  
sera compris en  
aucunes taxes.*

*S'il arriue peste,  
guerre, famine  
ou autres empeschemens luy  
sera fait rabais  
& diminution.*

*Associera qui  
bon luy semblera.*

sent Bail, lesdits Officiers s'abstiennent & se priuent de l'exercice & fonction de leurs Offices en ce qui concerne lesdites Gabelles : Comme aussi pourra ceder le present Bail ou partie d'iceluy, soit par Greniers ou generallyment à telles personnes, prix, charges & conditions que bon luy semblera, demeurant tousiours ledit Fermier & ses Cautions responsables du present Bail.

## L X X V.

*Pourra dès a. present e. tablir des Commis & Contro'leurs pour empescher les for. cemens, versemens & desplacemens.*

SERA permis audit Fermier, d'establir dès a present les Commis Controlleurs, pour empescher les forcemens des ventes, versemens & desplacemens des sels qui pourroient estre faicts, comme aussi de prendre possession du present Bail au premier Iuillet prochain, en attendant la verification d'iceluy : deffences aux Officiers des Greniers & tous autres, d'y donner empeschement à peine de tous despens, dommages & intersts.

## L X X V I.

*Demeure ledit Fermier dès a present maistre des voictures.*

QUE dès a present ledit Fermier demeurera Maistre des voictures des sels necessaires tant pour la fourniture desdites Gabelles, que Traictes Estrangeres, qui ne pourront estre faictes que par ses ordres : Et deffences seront faictes audit Riquier d'y apporter aucun empeschement, ains en cas que les greniers desdites Fermes & Traictes Estrangeres, ne se trouuassent suffisamment fournis des sels necessaires pour les ventes ordinaires du reste de son Bail, les receura des mains dudit Iannon, & en payera le mesme prix qui sera cõuenu avec les voicturiers. Enjoignant



ausdits Tresoriers de France de Montpellier, Intendants desdites Gabelles, Gardes & Contre-gardes des Salins de Peccais, de ne faire aucune difficulté, de faire charger lesdits sels sur les lettres dudit Iannon, & d'en expedier leurs polices de chargemens, & pour raison de ce, seront deliurez tous Arrests necessaires en attendant les verifications du present Bail.

## L X X V I I.

DEFENCES sont faictes aux Consuls & habitants du S. Esprit, d'apporter aucuns empeschemens aux tirages des sels destineez pour la fourniture de Teil, à peine de cinq cens liures d'amende, despens, dommages & interets dudit Fermier, sauf aux Officiers des Gabelles dudit S. Esprit d'assister si bon leur semble, aux mesurages & fournissemens desdits sels aux despens dudit Fermier

*Defences aux Consuls & habitants du S. Esprit d'apporter aucun empeschement aux tirages des sels destineez pour la fourniture de la Chambre de Teil.*

## L X X V I I I.

NOUS auons permis & permettons audit Fermier de rembourser quand bon luy semblera aux Officiers des Gabelles de Peccais & Narbonne, créez & establis ausdits Peccais & Narbonne, depuis l'année mil six cens trente-vn, la finance qu'ils auront payé en nos Parties Casuelles pour raison desdits Offices: Moyennant lequel remboursement, lesdits Offices demeureront supprimez, avec les gages & droicts y attribuez par les Edicts de leur creation, & à cet effet tous Arrests & expeditions necessaires en seront deliurez audit Fermier, lequel sera remboursé avec interets sur le pied du denier dix, des sommes qu'il aduancera & payera aux Pourueus & Porteurs des

*Permission de rembourser aux Officiers de Peccais & Narbonne créez depuis 1631. la finance de leurs Offices.*

*Continuation  
de ladite Creue.*

Lettres de Prouision desdits Offices, des deniers qui prouiendront de la continuation de ladite creuë & leuée desdits sept sols six deniers, par preference à toutes autres assignations fors & excepté ce qu'il conuiendra fournir pour la construction de ladite nouuelle Brassiere.

L X X I X.

*Place d'Armes  
de Narbonne.*

SERA ladite Creuë encore continuée iusques à la cōcurrence de la sōme de quinze mil liures, que nous auons destiné & destinons pour la construction d'une place d'Armes en nostre ville de Narbonne, au lieu designé par le sieur Duc de Schomberg, laquelle somme sera payée par ledit Fermier, ainsi qu'il luy sera par nous plus particulièrement ordonné des deniers prouenans de ladite creuë, apres neantmoins que ladite Brassiere sera parfaite, & lesdits Officiers de Peccais & Narbonne supprimez & remboursez.

L X X X.

*Defences aux  
Officiers de Pec-  
cais, Aiguemortes  
et autres, d'exi-  
ger d'autres  
droits que ceux e-  
stablis en conse-  
quence des Edicts &  
Ordonnances, à  
peine de cōcusion.*

DEFENCES sont faictes à tous Officiers de Peccais, Aiguemortes & autres, d'exiger d'autres droicts en Peccais, pour les sels qui s'y chargeront pour la fourniture desdites Fermes, que ceux qui sont de long-temps & a present establis à peine de concus- sion : Et ne sera ledit Fermier ny ses Voicturiers re- nus d'autre chose pour lesdits chargemens, que ce qui s'est pratiqué en consequence des Edicts & Or- donnances.

L X X X I.

*Le Conseil se  
reserve la co-*

QVE pour l'execution du present Bail, circon- stances & dependāces, toutes expéditions necessaires seront



feront deliurées audit Fermier, & s'il interuient quel-  
ques empeschemens, difficultez ou oppositions quel-  
conques à l'exécution du present Bail, que la cognois-  
sance en sera reseruée au Conseil d'État priuatiue-  
ment à tous autres Iuges.

## L X X X I I.

PROMETTONS en bonne foy & parole de Roy,  
auoir pour agreable le contenu au present Contract  
& iceluy faire inuiolablement obseruer de point en  
point selon sa forme & teneur, sans souffrir qu'il y  
soit contreuenue.

## L X X X I I I.

MOYENNANT lesquelles, charges clauses & con-  
ditions, & la jouyssance paisible desdites Fermes,  
ledit Iannon sera tenu de nous payer par chacune  
desdites neuf années du present Bail és mains des  
Tresoriers de nostre Espargne chacun en l'année  
de son exercice, la somme de Deux millions huit  
cens cinquante quatre mil liures, esgallement aux  
quatre quartiers de chacune desdites neuf années,  
& six sepmaines apres chacun d'iceux expiré, les  
gages des Officiers, Rentes, Franc-sallé & autres  
charges estans sur lesdites Fermes, prealablement  
desduites sur ledit prix, lesquelles il payera & ac-  
quittera suiuant les Estats qui en seront expediez  
en nostre Conseil au commencement de chacune  
desdites années, lesquels nous ferons deliurer audit  
Fermier: Et outre payera ledit Fermier la somme de  
six mil liures chacune desdites années aux Peres Je-  
suistes de Lyon: Et de plus, payera à la déliurance du

*Prix du Bail  
au Roy.*

*Autres charges  
du Bail.*

present Bail, les soixante quatre mil liures cy-dessus:  
Sçauoir, quinze mil liures pour le pain des Religieu-  
ses de cette Ville, cinq mil liures pour partie des or-  
nemens de la Chapelle du Louure, trois mil liures  
pour les Peres de l'Oratoire de Clermont en Auuer-  
gne, quatre mil liures a

& trente-sept mil liures à l'Espargne:  
Et outre aduancera comme dessus és quinzième De-  
cembre 1644. quinzième Ianuier, Feurier, Mars, A-  
uril & May prochains également, deux millions  
cent vingt mil liures, compris les interets pour l'ad-  
uance, dont il sera remboursé sur les quatre quartiers  
1647. & premier quartier 1648. de ladite Ferme es-  
galement, & ce qui s'en deffaudra sur le quartier d'A-  
uril 1648. L X X X I V.

*Baillera caution.*

Et pour seureté sera tenu de nous bailler bonne  
& suffisante caution d'un quartier du prix desdites  
Fermes, dont il remettra l'acte és mains du Secretaire  
de nostre Conseil pour y auoir recours quand besoin  
sera. L X X X V.

SI DONNONS EN MANDEMENT à nos Amez  
& Feaux Conseillers, les Gens de nos Comptes, Cour  
des Aydes à Paris, Cour de Parlement, Aydes à Dijon,  
Cour des Comptes, Aydes & Finances à Montpellier,  
Cour des Aydes de Clermôt-Ferrand & Cahors, Presi-  
dens, Tresoriers de Frâce & generaux de nos Finâces,  
& Intendans des Gabelles de Languedoc, Presidens,  
Tresoriers de France & Generaux de nos Finances  
à Lyon & Dijon, & à tous nos autres Officiers & Ju-  
sticiers que besoin sera le present contract, ils fassent



chacun en droit soy, lire, publier & enregistrer, & le contenu en iceluy faire inuiolablement obseruer & entretenir, ne souffrir qu'il y soit contreuenue en aucune maniere, restrictions & modificatiōs quelconques, nonobstant tous Estats, Priuileges, Lettres & precedens Baux qui ont esté cy-deuant expediez à ce contraire que nous auons reuoqué, reuoquons, oppositions ou appellations quelconques, dont si aucunes interuiennent, Nous auons retenu & reserué la cognoissance à nostredit Conseil, priuatiuement à tous autres Iuges: Deffendons comme nous faisons tres-expressément par cesdites presentes, à tous Gouverneurs de nos Prouinces, Villes, Forteresses, Chasteaux, Capitaines, Escheuins, Maires, Consuls, Cōmunautéz & tous autres Iuges de quelque qualité & condition qu'ils soient, de prendre, leuer ny exiger aucunes impositions ny autres charges quelcōques sur les sels desdites Gabelles de Languedoc & Lyonnois au preiudice du present Bail, & à ceux qui ont droit de peage d'vser en la leuée d'iceux d'aucunes forces ou violences, ains les leuer suiuant les Reglemens sur ce faits, à peine d'estre procedé enuerseux cōme infracteurs de nos intentions, & de tous despens, dommages & interelsts dudit Iannon. Enjoignons à nos Procureurs generaux en nosdites Cours des Aydes, de tenir la main à l'execution du present Contract, Mandons & commandons au premier nostre Huissier ou Sergeant sur ce requis, faire pour l'execution d'iceluy, tous exploitcs, sommations, commandemens & assignations dont il sera requis sans pour ce demander

aucune permission, Visa, ne Pareatis: CAR TEL EST  
 NOSTRE PLAISIR: En témoign de quoy, nous auõs fait  
 mettre nostre sel à celsdites presentes, desquelles d'au-  
 tant qu'on pourroit auoir besoin en plusieurs & di-  
 uers lieux, Voulons qu'au Vidimus d'icelles deuëmēt  
 collationnées par l'un de nos Amez & Feaux Conseil-  
 lers & Secretaires, foy soit adjousté comme aux Ori-  
 ginaux. DONNE' à Paris le dixième iour de Decem-  
 bre l'an de grace mil six cens quarante-quatre, & de  
 nostre Regne le deuxième. Signé, Par le Roy en son  
 Conseil, GALLAND. Et scellé.

*Collationné à l'Original par moy Conseiller,  
 Secretaire du Roy & de ses Finances.*

**L** Edit Maistre Jacques Iannon a fourny ses Cau-  
 tions pour seureté d'un quartier du prix, char-  
 ges, clauses & conditions du present Bail, ont fait les  
 submissiõs par acte du deuxième Ianuier 1645. estant  
 au bas dudit Bail, & esté receuës par Arrest du Con-  
 seil estant ensuitte, du quatrième iour dudit mois de  
 Ianuier. Signé, GALLAND.



